

善本書室藏書志

善本書室藏書志卷二十一

錢塘丁丙松生甫輯

子部十一

西京雜記六卷

明萬曆陝西布政司刊本

丹陽葛洪稚川集

前有萬曆乙亥蒲柯茂竹堯叟序昔太史公約國語戰國策諸史籍作記然諸籍不以故弗傳顧班史一成而劉子駿漢書遂廢獨葛稚川家有之乃於班氏所不錄者掇爲西京雜記並列嘉靖十三年黃省曾序云暇得葛洪氏西京雜記讀之云爲劉子駿所撰以甲乙第次百卷又鈔班固所不錄者二萬許言殆皆本於洪之後序爾原本二卷今作六卷據書錄解題蓋宋人所分此萬曆壬寅陝西布政司重刊後盧氏抱經堂校定本直題漢劉歆撰引書中稱成帝好蹴踘羣臣以爲非至尊所宜家

君作彈棋以獻以歆謂向爲家君也爲證洵讀書得間者矣

世說新語八卷

明刊本

宋劉義慶撰集梁劉孝標注

是書宋刻三卷元版始析爲八卷此從元槧出也篇目後有高氏緯略一則前有嘉靖間吳郡袁褰序後有萬厯間吳世懋跋此更爲凌瀛初校刊耳

譚賓錄十卷

舊鈔本

唐胡璩子溫著

郡齋讀書志云譚賓錄十卷右唐胡璩子溫撰皆唐朝史之所遺子溫文武間人新唐書藝文志崇文總目鄭樵通志皆作十卷宋史藝文志作五卷已佚其半

紀聞十卷

舊鈔本

唐牛肅撰崔造注

鄭樵通志藝文略唐牛肅撰紀聞十卷皆紀釋氏道家異事新

唐書與宋史藝文志皆列其目

教坊記一卷 舊鈔本 汪季青藏書

唐著作郎崔令欽撰

所記取天寶中樂部雜事陳氏書錄解題譏其鄙俗然後記一篇諠諠於聲色之亡國雖無一語顯指元宗而引漢成帝高緝陳叔寶慕容紹舊事反覆推明至爲痛切不但以曲調三百二十五名爲詞家攷證之資有古香樓圓印休甯汪季青家藏書籍方印

北里誌一卷 舊鈔本 汪季青藏書

唐翰林學士孫棨撰

前有中和甲辰無爲子序云諸妓皆居平康里舉子新及第進士三司幕府但未通朝籍未直館殿者咸可就詣如不恡所費

則下車水陸備矣其中多能談吐頗有知書言語者自公卿以降皆以表德呼之其分別品流衡尺人物應對造次良不可及予久寓京華時亦偷游其中俄逢喪亂鑿與巡省嶠函鯨鯢遭竄山林前志掃地盡矣追念前因聊以編次爲太平遺事其諸向彙刊於說海中此獨明時鈔本有古香樓休甯汪季青家藏書籍印及陳寶所印寶所名鴻寶一字位人仁和人乾隆辛未召試賜舉人歷官工科給事中

雲溪友議三卷

明刊本

汪秀峰舊藏

五雲谿人范攄纂

前有自序每卷目錄接正文所錄多一時聞人詩句曰友議實詩話也唐志本三卷直齋書錄作十二卷今商本稗海卷數同無自敘此猶存三卷之舊顧澗賓記云家兄抱冲曾得惠松崖手校者但云舊本不知何刻嘉慶辛酉買此於杭郡吳山書肆

取歸比對字句吻合鮑涿飲文云此亦是彙刻之一種嘗見泊宅編亦同此版匡暇更訪之此本出自新安汪秀峰家所謂開萬樓者也後之覽者珍焉

雲仙雜記十卷

明刊本

唐金城馮贄編

常熟瞿子雍藏書記雲仙雜記十卷題金城馮贄編并序陳氏書錄謂其出後人依託所記古事皆注所自出俱不經見者足供文人漁獵之資崑山萊竹堂葉氏得舊本倩友人俞質夫寫而刻之有序質夫名允文工書此卷序文俱割去惟後有玉峯等字當爲萊竹刊本雖不及宋槧以視藝海珠塵本則復乎上矣

雲仙散錄一卷

宋開禧刊本

前有天成元年十二月自序云予事科舉蓋三十年蔑然無效

天祐元年退歸故里築選書堂取九世所蓄典籍經史子集二十萬八千一百二十卷撮其膏髓別爲一書門目未暇派別成於四年之秋云云後有跋云右雲仙散錄唐天成中金城馮贇取家世所蓄書撮其異說而編之者也予來泉江得本於李茂叔貢士家愛之不能釋手欲鑄版以傳而病其多脫誤繼得新袁州羅史君家本從而是正遂爲全書羅本分上下卷李本總爲一卷攷之中興館閣書目李本爲是其先後之次亦有不同者今悉從李本云開禧元禩三月己卯臨江郭應祥識按陳振孫書錄解題疑馮贇爲子虛烏有之人趙與時賓退錄洪邁客齋隨筆說亦同張邦基墨莊漫錄載爲王銍僞造後又改桐雲仙雜記大抵因序畧天復元年而文內天祐四年成書年號倒置致生疑議今此序實作天成非天復按天成後天祐四年是原本年號本不倒置不知直齋何以誤作天復耶豈成字草書

與復字相近傳寫致誤耶鑊版寬大字畫端秀且用嘉泰及開禧等年官印冊紙所印歷六百數十年古香襲人上海徐紫珊跋之郁泰峰藏之東南兵火居然脫離豈不重可寶歟

唐摭言十五卷

舊鈔本

吳尺鳧舊藏

右五代王定保撰定保爲周王溥之族登第之年距朱溫篡唐僅六載是書蓋其八十五歲時所作凡一百有三門述唐代貢舉之制特詳多史志所不及卷末有嘉定辛未重午日柯山鄭昉書云唐以進士爲重摭言所載最爲詳備刊之宜春郡齋與好事者共之商氏稗海所刻刪削大半矣卷眉有吳焯記云摭言凡刻於說部中者都非足本此爲全鈔可寶也康熙己亥得於禾興旅舍舟中檢閱一過藏於繡谷亭

中朝故事一卷

宋鈔本

南唐尉遲偓撰

此書 四庫提要作二卷上卷記君臣事蹟朝廷制度下卷雜
陳神怪統爲小說體此作一卷當從宋出倕作此書蓋奉先主
李昇之命述唐宣懿昭哀四朝舊聞昇自稱系出太宗子吳王
恪故稱長安爲中朝耳

金華子二卷

舊鈔本 邵二雲藏書

南唐劉崇遠撰

郡齋讀書志云金華子三卷金華子崇遠自號也錄唐大中後
事一本題曰劉氏雜編直齋書錄解題云金華子新編三卷大
理司直劉崇遠撰五代時人記大中以後雜事原書久佚 四
庫館從永樂大典輯出二卷攷崇遠家本河南唐末避黃巢亂
徙渡江南仕李氏爲文林郎大理司直募黃初平之爲人自號
金華子有自序此本未錄有邵晉涵印觀書石室重遠書樓三
印

金華子二卷

舊鈔本 趙素門鈔藏

南唐劉崇遠撰

前有文林郎大理寺司直崇遠自序趙素門假趙晉齋藏本鈔
出手爲識之有古歡書屋趙輯甯印諸印

開元天寶遺事二卷

精鈔本

右五代王仁裕撰仁裕初仕蜀爲翰林學士蜀亡後棲寓長安
得民間所傳元宗時遺事記爲此書凡一百五十九條後有記
云此書所載明皇時事最詳至一話言一行事後之所引大抵
出於此書者多矣紹定戊子刊之桐江學宮山陰陸子適書前
有建業張氏銅版印行一條後黃蕘圃識語四則云顧氏文房
小說本在汲古閣毛氏時已珍之宜此時視爲罕祕矣

南唐近事一卷

明刊本

何夢華藏書

宋鄭文寶仲賢撰

藏書志卷二十一

五

卷前有太平興國二年五月一日文寶自序云南唐烈祖元宗後主三世共十四年自天福丁酉終開寶乙亥君臣用舍朝廷典章兵火之餘史籍蕩盡惜乎前事十不存一余匪鴻儒頗常嗜學耳目所存志於縑湘聊資抵掌之談爾仲賢汀之甯化人三山徐興公煥得其江表志吳希堯梓之此則黃司理槐開所刊萬曆庚申司理與興公希堯竝序之有何元錫印

友會談叢三卷 舊鈔本

華陽上官融撰

此書阮文達曾進內府掣經外集引陳振孫云融不知何人按書中稱其父嘗宰建之浦城縣是編前有天聖五年自序卷帙與宋史藝文志通志藝文略焦竑經籍志並同所紀皆宋代故事多言報應示勸戒如紀呂端出使高麗與宋史端本傳合紀太平興國三年以定陶地建爲廣濟軍與宋史地理志亦同

非絕無依據者可比

王文正筆錄一卷

明翻宋本

王曾

曾字孝先青州益都人咸平五年鄉貢試禮部廷對皆第一官至集賢殿大學士封沂國公謚文正此書三十餘條乃記太祖太宗眞宗朝廷舊聞間及仁宗而止

涑水紀聞二卷

舊鈔本

宛平查氏藏書

是書雜錄舊事起太祖迄神宗每條皆注其述說之人故曰紀聞雖偶涉瑣事要以國家大政爲多蓋欲作資治通鑑紀此以諸史料後黃庭堅等修神宗實錄多取是書紹聖初鄧聖求蔡京上章指爲謗史實錄重修多所刪削世傳凡三本一爲十卷與書錄解題合一爲十六卷又補遺一卷其中多重出之條一爲二卷不知何人所併其文無大同異宛平查氏如蓮坡解元

爲仁恂叔中丞禮皆水西莊主人圖書富有此亦零瑣片玉也
灑水燕譚錄十卷 校宋鈔本 黃堯圃舊藏

齊國王闢之聖塗

自序云齊國王闢之將歸灑水之上治先人舊廬與田夫樵叟
間燕而譚說也余登科從政行三十年日欲退居爲貧未果今
且老矣仕不出乎州縣身不脫乎飢寒不得與聞朝廷之論史
官所書間接賢士大夫譚議有可取者輒記久而得三百六十
餘事編爲十卷紹聖二年正月甲子又昌邑滿中行題云聖塗
余同年進士也每得一嘉話輒錄之大抵盡忠義尊行節不取
怪誕無益之語元祐四年予來守蒲聖塗方爲邑河東因得觀
之後李北苑跋曰稗海所刻缺第十卷以第四卷分兩卷以符
十卷之數又缺序目非足本也茲從宋雕錄出較商刻又多三
十一條目錄後有臨安府太廟前尹家書鋪刊行一條黃堯圃

更以宋刻校正宋刻每葉十八行行十八字有堯圃手校堯翁
藉韻何元錫印夢華館藏書諸印

錢氏私誌一卷

舊鈔本

吳尺見藏書

宋錢世昭

前序云叔父太尉昭陵之甥見宣政太平文物之懿逮事太上
備膺眷遇在帝左右銜命出疆凡耳目所接事出一時語流千
載者廣記而備言之世昭敬請而集名曰錢氏私誌云姪迪功
郎秀州嘉興尉世昭此爲吳焯瓶花齋鈔本記云錢氏私誌譏
詆廬陵漁隱叢話謂歐公作五代史不深美吳越世昭以私憾
毀之非信論也案舊本或題錢彥遠撰或題錢恂撰錢曾讀書
敏求記辨之甚晰書固非彥遠所爲亦非盡恂所纂殆恂記所
聞見而世昭序而集之也有瓶水花香繡谷蕭習兩印

江都幾雜志二卷補一卷

星鳳閣校宋鈔本

山陰杜春生藏書

鄰幾名休復開封陳留人舉進士充集賢校理復官刑部郎中
修起居注宋史有傳是書一名嘉祐雜志晁陳兩志宋藝文志
文獻通攷皆作三卷此寫本二卷後一卷云從宋刊本補錄墨
格版心刻星鳳閣正本版匡外刻梅泉居士校蓋淺山趙氏遺
籍也按補錄凡二十七條前二十條皆見侯鯖錄後七條從天
一閣本所補似尙非宋槧真本且曾慥類說第二十二卷採此
書甚多中有五十一條又在此二卷之外通鑑長編所引又有
十三條愛日齋叢鈔又有一條亦爲此本所無嗚當續錄以成
完書有淺山後人舊雨樓書畫印錢塘趙氏星鳳閣藏書山陰
杜氏知聖教齋藏書諸印

蘇黃門龍川志略十卷

明覆宋本

左迪功郎新授撫州宜黃縣主簿主管學事劉信校正

前有蘇文定公自引云子自筠徙雷自雷徙秦二年之間水陸

幾萬里老幼百數十指衣食自致也有書數百卷付之他人既之龍川雖僧廬道室皆不許入哀裘中餘五十千以易民居比垣有隙地可以毓蔬有井可以灌乃與子遠荷鋤其間既數月韭蔥葵芥可蒞可莖蕭然無所復事乃追思平昔如記所夢遠執筆在傍使書之凡四十事十卷命曰龍川志略尙有別志八卷未嘗併梓。

孫公談圃三卷

明復宋本

高郵孫君孚

建中靖國元年臨江劉延世述之引云紹聖改元凡仕於元祐貴顯者例皆竄貶湖南嶺表獨孫公遷於臨汀避謗杜門余時侍親官長汀縣竊從公游聞公言皆可以爲後世法追而筆之集爲三卷命曰孫公談圃云後六十八年爲乾道二年季孫競以事來臨汀請於外舅郡太守晁公槩於木王楸野客叢書云

余得山陽吳氏建炎初錄本校之多三段其後二段乃公之甥

朱稭所記今本無之

暇當從野客叢書十五卷中補寫

侯鯖錄八卷

明芸川書院刊本 鮑以文舊藏

涿鹿顧銳識曰聊復翁名合時爲前宋宗室安定郡王以才美見喜於蘇文忠公嘗取諸儒先佳詩緒論逸事與書傳中及人所嘗談隱語奇字世共聞見而未知出處者冥搜遠證著之爲書名曰侯鯖錄意亦以書之味比鯖也按知不足齋叢書中鮑廷博識曰侯鯖錄近惟稭海本行於世誤書脫簡殊不耐觀予藏有三本一芸川書院本不知刊於何時似商本所祖也一明天啟間海虞三槐堂坊刻密行細字一舊鈔本分上下卷較諸本爲勝暇日參合交訂又檢他書證其異同較商刻則迥庭矣此芸川書院刊本鮑氏用朱綠筆一再校改卽刊叢書之底本

也

國老談苑二卷

明翻宋本

夷門隱叟王君玉編

攷書錄解題宋史藝文志作國老閒談卷數相合惟不注王姓豈後來改其名而增其姓耶所記太祖太宗眞宗三朝遺事於當時士大夫褒貶無所假借大致猶據實可信

湘山野錄三卷續一卷

明鈔本

邵二雲藏書

吳僧文瑩

文瑩字道溫錢塘人文獻通攷引晁氏讀書志以爲吳僧晁志實無吳字馬攷誤也書成於熙甯中多記北宋雜事續錄中太宗卽位一條李燾引入長編啟後世之疑然觀其始末乃誤會其詞非作者本意因作於荊州之金鑾寺故以湘山爲名後有墨筆楷書跋云此明時寫本爲文可禪師所藏苔村老人徐元

贊借而留案頭者二十年其後嗣不肖舉師生平巾拂售貨殆盡并議棄菴暇日檢得此冊始歎幸留吾處時資翻閱不然其付之醬園驢坊之灰蝕者久矣康熙三十三年中秋後五日識
有功變私印元贊兩圖記并邵氏二雲一印

道山清話一卷

明發宋本

右帙舊題王晦者誤所記皆北宋雜事終於崇寧五年深詆王安石亦不滿於程伊川劉摯惟於蘇黃晁張交際議論特詳殆爲蜀黨中人故次行僅有木條未列著書姓名或先有所諱耳
續鑒客揮犀十卷 舊鈔本

宋彭乘撰鑒客揮犀十卷 四庫已著錄此其續編也陳振孫書錄解題前續二編共二十卷而不著撰人姓名商氏刻稗海題作彭乘蓋以書中所自稱名爲據此鈔間有空格猶從宋本錄出者

默記三卷 舊鈔本

王銍性之

所記多汴都朝野遺聞惟末一條乃攷正陳思王感甄賦事也
有風流入豪射湖雄略兩印或錢氏舊藏歟

揮塵前錄四卷後錄十一卷三錄三卷餘話二卷

明鈔本

朝請大夫主管台州崇道觀汝陰王明清編次

前錄卷首實錄院慶元元年七月初八日牒文戴溪李璧高文
虎石宗昭諸衙又慶元元年九月牒戴溪李璧顏械王容邵康
高文虎劉德秀楊輔應孟明黃由葉翥諸衙消熙乙巳中元清
明日跋後錄無序跋三錄慶元初元仲春明清自跋曰前年厠
迹蹕路假居於臨安之七寶山俯仰顧盼聚山林江湖之勝於
几案間襟懷灑然記憶舊聞繁後錄幸成去歲贅丞海角隨手
濡毫又獲數十事漫名曰第三錄餘話後有慶元庚申浚儀趙

不謫序有徐世禎一印白紙藍格殆明時寫本

揮塵前錄四卷後錄十一卷三錄三卷餘話二卷

盧抱經校鈔本

朝請大夫主管台州崇道觀汝陰王明清編次

前列寶錄院官牒及檢討官銜名與前帙同前後三錄皆記朝廷故事自跋謂記憶殘闕以補冊府之遺三錄中於高宗東狩事尤詳餘話則兼及詩文碑銘之屬此爲抱經先生一再校勘有盧文弨弓父手校一印

玉照新志五卷

舊鈔本

鮑以文校藏

宋王明清撰前有慶元戊午明清得玉照一色澤溫潤制作奇古眞周秦之瑞寶也又獲米南宮書玉照二字因揭寓舍之斗室屏跡杜門思索舊聞凡數十則名曰玉照新志務在直書初無私意明繡水沈士龍德先孚先同校刊作六卷鮑廷博以秦西巖本校前二卷吳方山本校後三卷并以元人錄本通校一

過鉤六爲五丹黃燦然足稱善本余所藏明鈔揮塵鮑校玉照
璜川投轄皆精審不謬可謂三絕矣

投轄錄一卷

舊鈔本

璜川吳氏藏書

汝陰王明清仲言父

前有紹興己卯十月自序書錄解題謂所記皆奇聞異事客所
樂聽不待投轄而留也所列凡四十四事掇拾叢碎乃晚年所
作有璜川吳氏收藏圖書

雞肋編三卷

鈔本

邵蕙西校藏

宋莊季裕撰

季裕名綽以字行清源人其父與蘇黃米晁游季裕猶及見芾
與補之學問頗有淵源書中所錄多識舊事其記遼宋誓書一
條大旨以和議爲主邵位西員外記云近日琳瑯祕室叢書始
得影元鈔本用活字擺印姚仲芳因以此見贈 閣本刪去一

條刪改二條皆爲補正又記云季裕生南北宋之交遭時亂離所記引杜詩喪亂死多門二條極爲沈痛紹興初元兵馬錢糧之數亦他書所未載岳侯一軍五萬人月約五十餘萬緡視今亦不相遠辛酉十一月十四日復閱又記時杭城被圍五十日矣按是月二十八日杭城陷邵公殉焉此殆絕筆耳蕙西名懿辰又號位西仁和人道光辛卯舉人官刑部員外郎

河南邵氏聞見後錄三十卷

明汲古閣寫本

黃堯翁校張紹仁藏

宋邵博著

前有紹興二十七年三月邵博自序博以父伯溫有聞見錄故此以後名然父尊程氏子助蘇氏以攻程何耶錢遵王敏求記云余既繕寫伯溫聞見錄又購得邵博後錄舊鈔本曾經前輩校此或卽遵王所稱舊鈔也有讀異齋從校正善本張紹仁印初菴執經堂藏善本諸印紹仁字學安長洲人有執經堂收藏

古刻校勘甚勤

北窗炙輠錄二卷 舊鈔本

施彥執編

炙輠取義消于冕是書所記多當時前輩盛德可爲士大夫觀法者實非滑稽嘲弄爲主不知何以命名彥執名德操海昌人張子韶之友生不婚宦病廢而歿嘗著孟子發題一篇子韶之門人郎晫編橫浦集附之卷末書久罕傳朱竹垞得之海鹽陳氏稍得流傳

程史十五卷附錄一卷 明刊本

相臺岳珂

前有倦翁自序明成化十一年建安江沂序云舊版刻於浙江嘉興脫落旣多讀輒中廢奉按廣東姑蘇劉公欽謨忽出善本經陳璧文東先生批點者遂翻登諸梓按岳武穆王五子雷雲

霖電霆倦翁霖之子也仕至嘉興知府嘉靖乙酉桐溪錢如京重刊序云今浙臬司地宋岳王故宅也癸未予自江右來總司事循遺跡則水監亭孝娥井存焉水監今爲祠祀國初犯難王公亦天以流武穆之風也是用重錄程史校而刻之爰附之本傳而并之銘祠之記皆得列焉有人心者亦將有感於斯編後有潘旦祝鑾兩跋皆嘉靖乙酉作也

四朝聞見錄五卷

舊鈔本

龍泉葉紹翁

紹翁字嗣宗嘗爲京朝官所錄分甲乙丙丁戊五集記高孝光甯四朝軼事各有標題惟丁集僅記甯宗受禪慶元黨禁二事沈嘉轍吳焯厲鶚趙昱陳芝光趙信符曾南宋雜事詩所引用者半在於斯也有西河魯氏珍藏漢後隋前有此人曹猶延年益壽之齋各印

癸辛雜識前集一卷續集二卷別集二卷

抱經堂寫校本

癸辛街者宋楊和王之府因屋向得名也周草窗密寓居此里遂著是書與齊東野語大致相近野語多記朝廷政事攷證舊文此則無所辨訂但記瑣言雜事前集有自序盧抱經先生鈔本尾葉識云杭人有欲梓是書者但据汲古毛氏本友人惜其功力之徒勤也因屬余校正之既竣而刻書之人畏累中輟矣有盧文弨召弓父二印

歸潛志十四卷

小山堂鈔本

劉祁

自序云余生八年從祖父游宦於大河之南時南京爲行宮因得從名士大夫問學不幸弱冠而先子歿進於有司不得志將歸隱於太皞之墟一旦遭值金亡干戈流落由魏過齊入燕凡二千里甲午歲復於鄉蓋年三十二矣昔所交游皆一代偉人

其言論談笑想之猶在目且所聞所見可以勸戒規諫者不可
湮沒暇日記憶隨得隨書題曰歸潛志其書一卷至六爲金末
諸人小傳七至十雜記軼事十一卷記哀宗亡國始末十二卷
記崔立作亂劫羣臣立碑事自是以下皆祁之語錄詩文元修
金史多採撮焉至大辛亥趙友穆識其後小山堂趙谷林識云
劉京叔歸潛志余先購得八卷後從丁敬身得其全補錄之按
讀書敏求記云周雷客黃俞邵微刻書目祇列八卷殆未見全
書同好之友瓶花齋秋聲館江聲草堂及堇浦樊榭各襲完本
亦藝林樂事丁未小滿與今庭意林對校畢

歸潛志十四卷

鮑氏知不足齋鈔本

前有乙未季夏渾源劉祁京叔自序蓋壬辰北還以歸潛勝於
室卽題其所著金亡五年之後復出就試魁南京選充山東西
路政試官又七年而沒錢曾讀書敏求記載此首卷乃陸孟鳧

手錄以炫藝林此爲鮑以文廷博手寫校本丹黃滿紙圈點精細卷尾每紀歲月雜事卽爲刊知不足齋叢書底本居今視昔亦不下於孟覓手錄也有奇書無價皆大歡喜以文手鈔三印按知聖道齋讀書跋云卷中敘崔立碑事乃京叔平生疚心處鮑氏附注元裕之外家別業上梁文郝陵川辨甘露碑詩可謂得是非之公京叔裕之乃兩造之辭其以伊誰受賞一語歸獄京叔則京叔並不諱言之且以其時京叔安用崔立所賜之進士出身爲也陵川乃裕之門下士觀其集中裕之墓誌京叔哀辭於二子軒輊可見要之碑辭之作無論爲元爲劉而裕之乃右司員外郎京叔布衣情事有間特附此備攷

山居新語四卷

影寫元刊本

太史氏楊瑀元誠

前列至正庚子三月中奉大夫浙東道宣慰使都元帥楊瑀自

序又有會稽楊維禎序

靜齋至正直記四卷 舊鈔本

元闕里外史孔齊著

齊字行素號靜齋曲阜聖裔隨父居溧陽後避兵四明父字退之曾補建康書吏明嘉靖三十八年歸有光跋云余雅好流覽一日得是編於鄉塾按其書至正間舊物不免有磨脫之患因攜歸讀之乃知公於崎嶇避地之際備得人情物態之詳筆諸簡牘久而成編雖文未雅馴而持已處家之方貽謀燕翼之訓亶亶乎有當於道故爲手錄且訂其舛謬以俟付梓 四庫總古云所謂直記亦證父攘羊之直歟有蒙泉藏書印或爲奚鐵生舊籍

東南紀聞三卷 舊鈔本 邵二雲藏書

不著撰人姓名 四庫館鈔自大典并攷卷中有丙子之事非

復庚申之役語知爲元人所作故稱宋爲東南餘證出數條皆元人語此本後有邵晉涵記云此從永樂大典中錄出不著撰人姓氏蓋宋遺民所纂述也中間有與程史相同者其爲鈔撮而成歟抑各記其所聞歟其紀史彌遠爲之之凶險有出於諸家紀載之外者當時遺老痛心於彌遠者深矣辛丑夏館吏錄副本求售因留之癸丑五月病初起校閱一過譌字不可盡乙俟求別本證之有文淵閣校理晉涵邵氏二雲道甫借閱諸印閱是跋可見當時館吏備書覓食所錄匪止一書一部也守山閣刊本外未見別刻

南村輟耕錄三十卷

明成化刊本

天台陶宗儀九成

前有至正丙午孫作太雅序書中稱明兵曰集慶軍或曰江南遊軍蓋未入明時所著也有元一代法令制度及至正末東南

藏書志卷二十一

五

兵亂之事紀錄頗詳攷訂書畫文藝亦多足備參證成化十年
華亭錢浦序曰陝石白公大本守吾松訪得先生的本不以自
私質於督學御史戴公廷珍覽而是之刻置郡齋而屬予爲序
水東日記四十卷

明刊本

山陰祁氏舊藏

崑山葉盛著六世孫重華較梓

文莊所記皆明代制度及一時遺文逸事館臣謂其留心掌故
於朝廷舊典攷究最詳又家富圖籍茶竹堂書曰頗多罕觀之
笈故引據亦較他家裨販成編者特爲博學 四庫著錄三十
八卷今爲四十卷殆分併不同歟卷首有阿李燈下課壬辰七
月廿七日開卷尾書壬辰二月十九日覽竟小字有理孫之印
奕慶李孫三印按壬辰爲順治九年理孫爲祁察院忠敏公之
幼子時方弱冠正排日誦讀也忠敏盡節寓山故卷口有寓山
藏三字理孫字奕慶其兄班孫字奕喜朱竹垞曝書亭集中所

稱祁五六公子是也理孫坐事戍濟陽錢塘趙谷林意林兩徵士其宅相也嘗思得外家遺書藏之小山堂以慰萱親卒不可得僅構曠亭於春草園讀此書增三百年故家喬木之慨云菽園雜記十五卷

明刊本

何義門校戴松門藏

吳郡陸容文量著

容號式齋太倉州人成化丙戌進士官至浙江右參政見明史文苑傳是書於明代朝野故實敘述頗詳多足與史相攷證談諸雜事皆並列焉震澤王文恪公曰本朝紀事之書當以陸文量爲第一卽指此也後有陸仲榮校毛元仲刻兩行嘉慶丙子戴光曾誌云菽園雜記七冊何義門先生批校善本舊藏士禮居予與黃復翁往還最密出此贈予良友之遺不敢忘也有何焯之印岷瞻貞志堂諸印光曾字松門嘉興貢生官至河工同知

野記四卷

明刊本

李鹿山藏書

句吳祝允明集

前有自序云允明幼存內外二祖之懷膝長侍婦翁之杖几師門友席崇論爍閱洋洋乎盈耳矣坐志弗勇弗卽條述新故溯仍久益迷落因追憶輒書一已漏九或眾所通議部具他策無更綴陳孔子曰質則野文則史大略不欲侵於史焉辛未歲八月望在家筆完 四庫入存目前有玉笥山人毛文燧序卷首鈐曾在李鹿山處一印

西吳里語四卷

吳石倉鈔本

吳興宋雷著

宋雷湖州人自號市隱居士是編成於嘉靖中皆記吳興軼事其第三卷爲石倉吳先生手鈔有石倉手校州來氏藏書記二印

何氏語林三十卷

明刊本

陳謝浮藏書

華亭何良俊元朗撰并注

前有文徵明序及目錄凡三十八篇總二千七百八十六事其義例門口仿劉義慶世說新語而雜採宋齊以後事蹟每條下又仿劉孝標例自爲之注館臣稱其語有根柢非明人小說可比此周滙西亂中爲余所搜殘書八百束之一帙不惟不損不缺且是吾杭海昌陳謝浮侍郎舊物維桑與梓必恭敬止況三百載後經劫之遺編邪有春草亭謝浮父陳論三印論字謝浮號西齋海甯人康熙甲辰進士官至刑部侍郎

汝南遺事二卷

舊鈔本

玲龍山館藏書

郡人李本固叔茂甫撰

本固字茂叔汝甯人萬厯甲戌進士官大理寺卿前有己酉自序云與費應祥李景哲初屬同修河南志其削草未經收錄者

復輯爲是書此書爲兩淮馬裕家藏本曾經進呈發還者上

鈐有翰林院印

人海記二卷 舊鈔本

海甯查慎行悔餘集

自序云蘇子瞻詩惟有王威最堪隱萬人如海一身藏與東方曼倩陸沈金馬之意寄託略同余自甲子夏北游太學又九年舉京兆秋試又十年唱第南宮其後供奉內廷者七年從事書局者三年迨癸巳移疾乞歸年已六十有四通計三十年來客居京師其間耳目間見隨手綴錄零丁件系不下數百條雪窗檢點哀集成卷命曰人海記

右小說家雜事之屬

山海經十八卷

靈巖山館刊本 盧抱經校藏

晉記室參軍郭璞傳

前有璞自序並劉秀校上是書見於晉書本傳隋唐二志皆云
二十三卷今本少五卷疑後人併其卷帙以就劉秀奏中之數
書中序述山水多參以神怪故道藏收之然實非黃老之言其
爲小說之最古者歟虛抱經據宋本校正惜有缺佚

王子年拾遺記十卷

明刊本

蕭綺序錄

記本秦王嘉撰原本十九卷二百二十篇經亂佚闕梁蕭綺掇
拾殘牘編作十卷并爲序錄錄卽論贊之別名上起三皇下至
石虎事蹟半屬子虛但取詞藻鮮豔耳書係仿宋諱多闕筆有
樂意軒吳氏藏書印吳芝愚竹居諸印

前定錄一卷續錄一卷

明覆宋本

唐鍾輅撰輅太和中人官崇文館校書郎書錄解題稱前錄二
十三則其自序謂庶達識之士知其不誣奔競之徒足以自警

較他小說爲有勸戒續錄亦載之書錄解題不題撰人姓氏凡二十四事

開天傳信錄一卷 明覆宋本

吏部員外郎鄭綮撰

綮字蘊武滎陽人累官至右散騎常侍禮部侍郎同中書門下平章事書中皆記開元天寶故事凡三十二條自序簿領之暇搜求遺逸期於必信故以爲名

青瑣高議前集十卷後集十卷別集七卷 鈔黃麴園藏本

晁公武讀書志馬端臨藝文志並著錄皆不著撰人姓名趙與峕賓退錄稱爲劉斧撰當必親見標題前有資政殿大學士孫副樞序劉斧秀才者自京來杭謁余出此異事數百篇予愛其文求余爲序云云副樞不署名亦不紀歲月疑坊賈所爲其書皆記宋時怪異事蹟及諸雜傳記每條下各爲七字標目漁洋

山人謂此乃翦燈新話之前茅黃蕘圃一再跋之見士禮居藏書題跋中

太平廣記五百卷

明談氏刊本

別下齋蔣氏藏書

宋翰林學士中順大夫戶部尚書上柱國賜紫金魚袋李昉等編此書奉敕與昉同修者扈蒙李穆湯悅徐鉉宋白王克貞張洎董道趙鄰幾陳鄂呂文仲吳淑十二人也以太平興國二年三月奉詔三年八月表進六年正月雕版凡分五十五部所採書三百四十五種古來軼聞瑣事僻笈遺文咸在焉卷前列昉進書表附列同修諸臣銜名及引用書目并目錄明嘉靖丙寅都察院右都御史致仕十山談愷校刊附記云太平廣記詔鏤版頒行言者以非後學所急收版藏太清樓雖崇文總目不及廣記鄭樵乃以爲御覽中別出廣記誤兩爲一傳世甚罕因與秦汴強仕唐詩同校尙闕噉鄰類二卷無賴類二卷輕薄類一卷

酷暴類閼胡濶等五事婦人類閼李誕等七事今從別本鈔足
有放菴居士文房之記別下齋藏書印

五色線三卷 舊鈔本

中興館閣錄有此書名不著編輯名氏 四庫提要謂雜引小
說新誕之語不紀所出收入存目此前有宏治二年七月淮南
冀綺刊序綺字文華實應人成化五年進士爲戶部郎中言邊
務及時政二十餘事又奏劾皇親姚福怙縱成化二十年宣化
殺賊有功陞轉太僕卿奏均攤馬政減揚州五州縣牛馬若干
匹民甚德之後毛扆識云五色線凡三卷先君舊藏止上下二
卷刊入津逮祕書辛酉夏訪書於章邱李氏中麓先生之後得
冀刻乃有中卷其序述原委甚明今鈔入家刻中且附冀公事
略於序後特存此書以代補遺

陶朱新錄一卷 鈔本

宋馬純撰

前有紹興壬戌自序云樸橄翁單父人也建炎初避地南渡宦游不偶以非材棄寓陶朱山下藜羹不糝晏然自得因搜今昔見聞裒綴成帙純字子約隆興初以太中大夫致仕居越之陶朱鄉故以名編錄乃雜說非致富書也

夷堅甲志二十卷乙志二十卷丙志二十卷丁志二十卷

影宋本

按四庫所收者乃支志五十卷與此不相涉此卷首有古杭一齋沈天祐序稱建學所存舊刻闕本殘闕承本路府判張紹先之命以浙本補全者邁每集各自爲序惟四乙未成不及序計三十一序載於賓退錄中此乙丙丁三字與賓退相合每卷下注若干事每事亦必注明某人所說以著其非妄書中神怪荒誕之談居其大半然遺文軼事可資攷鏡者亦復不少儀徵阮文達從嚴元照借錄進呈學經室外集列有提要而宋樓

別藏新編分類夷堅志爲建安葉氏祖榮類編與此足爲表裏
今鈔其目錄附於卷末

續夷堅志二卷

舊鈔本

太原元好問裕之纂

好問號遺山官至左司郎中事蹟具金史本傳是編續洪景廬
而作所紀皆金秦和貞祐間神怪之事 四庫總目云前有白
序見於遺山集此本無之蓋傳寫佚脫也今檢遺山集亦無此
序惟前集尾有至順三年石巖民贈識云吳中王起善博學且
勤人有異書必手鈔之此其一也按遺山先生當中原陸沈之
時皆耳聞目見之事非若景廬演史寓言也其好善勸惡不爲
無補後集尾載金史本傳並王東起善識云予鈔北地東本續
夷堅志四冊寶遺山先生所撰至正戊子武林新刻金史因獲
一觀謹謄此傳附後更有宋无子虛一跋并題一詩及華亭孫

道明題識

重刊湖海新聞夷堅續志前集二卷後集二卷

精鈔本

不著撰人名氏前集分人倫人事符讖珍寶拾遺藝術警戒報應八門各分子目各標四字爲題凡二百二十一條後集分神仙道教佛教文學神明怪異精怪靈異物異九門凡二百八十八條首條曰大元昌運紀元太祖太宗世宗事餘紀宋元雜事間及前代已不及十之一署名與洪氏同體亦相似

效顰集三卷

明宣德刊本

漢陽儒學教諭南平趙弼撰

是編三卷凡二十六篇皆紀報應之事意寓懲勸而詞則近於小說漢陽知府新安王靜梓之後有宣德戊申二月弼自序曰余嘗效洪景廬瞿宗吉編述傳記皆聞先輩碩老所談與已目之所擊者初但爲暇中之戲不意好事者傳錄於士林欲毀其

稿已無及矣因題曰效顰集固不敢希洪瞿二公之萬一云提要云第三卷中闕疥鬼對夢遊番陽傳二篇似未見此刻也

都公譚纂二卷

舊鈔本

汪魚亭藏書

門人陸采編次

按提要明都穆撰記錄元明以來逸事然多涉神怪此書首五葉爲宋賓王手錄書法在楷隸之間有汪魚亭藏閱書一印

二酉委談一卷

明刊本

吳郡王世懋敬美著

敬美著有卻金傳窺天外乘此乃隨筆雜記中多神怪之跡及因果之事

治城客論二卷

舊鈔本

天池山人吳郡陸采子元記

采長洲人采之弟也是編乃肄業南雍時記所聞見大抵皆妖

異不根之言惟敘語明雋耳

右小說家異聞之屬

述異記二卷

依宋鈔本

梁記室參軍任昉撰

前有序曰按梁史云昉字彥升舉兗州秀才拜太學博士爲齊竟陵王記室參軍洎梁武踐祚爲給事黃門侍郎轉御史中丞出爲新安太守卒年四十八昉家書三萬卷故多異聞採於羣書撰新述異記上下兩卷皆得所未聞將以資後來刀筆之士好奇之流文詞怪麗之端抑亦博物之意者也後慶厯間宋人序有臨安府太廟前經籍鋪尹家刊行一條

唐段少卿酉陽雜俎二十卷

明萬厯刊本

臨淄段成式撰

成式字柯古臨淄人宰相文昌之子故鄧復張丑並稱其出於

將相之冑也西陽者取梁元帝訪西陽之逸典語殆本二西藏書之義書則奇文祕牒頗多詔怪唐書藝文志作三十卷胡應麟筆叢云西陽雜俎世有二本皆二十卷張氏愛日精廬藏書記載元刻本二十卷此爲萬厯戊申李雲鵠翻元刻本有瞿良印讀書天氣兩圖記按嘉定癸未武陽鄧復應甫題序陳君所刊止前集二十卷又缺其序余以家藏續集十卷并前集十卷畢之遂成全書秦昌紀元玉峰張丑題云今刻本皆二十卷而續集不傳雖以胡元瑞之廣收博采卒未遇其原本僅於太平廣記錄爲一冊亦莫能完十卷之舊此雜俎續集十卷的係宋人寫本云云毛刻津逮張刻學津討原均有續集殆從之出也暇當鈔補其全

開顏集二卷

舊鈔本

試祕書省校書郎周文玘集

文獻通攷作三卷此本有自序云笑林所載皆事作稽古語多
猥俗博覽之士蓋無取也余於書史內鈔出談資事合成兩卷
因名曰開顏集卷上卷下各三十五事周之里籍未詳

新刻古杭雜記詩集四卷

汲古閣寫本

說郛有古杭雜記題元李有撰與此本參較僅首二條相同餘
皆互異觀其標題古杭雜記爲總名而詩集爲子目乃全書之
一集也載理度二朝嘲笑之詞有關事實者如本事詩之例此
本爲汲古閣鈔版心有自文汲古閣寫本五字目錄後有識語
云已上係宋朝遺事一新繡梓求到續集陸續出售與好事君
子共之二行與愛日精廬藏本同又有一依廬陵正本六字一
行蓋元時江西書賈所刊也光緒庚辰午月鮑叔衡從江陰試
棚寄到梓入掌故叢編有竹泉珍祕圖籍設間閣二印
右小說類瑣語之屬

善本書室藏書志卷二十一終

善本書室藏書志卷二十二

錢塘丁丙松生甫輯

子部十二

宏明集十四卷

明鈔釋藏本

梁釋僧祐撰

祐姓俞氏彭城下邳人初出家揚都建初寺武帝時居鍾山定林寺所輯自東漢以下至梁代闡明佛法之文其學主於戒律其說主於因果大旨則獨伸釋氏之法六代遺編此爲最古梁以前名流著作世無專集者頗賴以存卷數與唐書藝文志合四庫著錄本僅有祐自撰後序而無前序諸家所藏皆然此從明釋藏中鈔出猶存前序云祐以末學志深宏護靜言浮俗憤慨於心遂以藥疾微間山棲餘暇撰古今明篇總道俗雅論其有刻意翦邪建言衛法製無大小莫不畢採又前代勝士書

記文述有益三寶亦皆編錄類聚區分別爲十四卷卷角注釋藏字號

高傳集十四卷

舊鈔本 孫淵如舊藏

梁會稽嘉沙寺沙門釋慧皎撰

前有自序云始於漢明帝永平十年終於梁天監十八年凡四百五十三載二百五十七人又傍出附見者二百餘人開其德業大爲十例其一譯經二義解三神異四習禪五明律六遺身七誦經八興福九經師十唱導後有記曰高僧傳慧皎法師撰法師學通內外精研經律撰此傳十四卷梁末承聖二年避侯景難來湓城少時講說甲戌二月捨化春秋五十有八江州僧正慧恭爲首經營葬廬山釋僧果同避難在山聊記云耳後有嘉慶丁卯孫星衍手記慧皎高僧傳 四庫書未及收余讀釋藏於金陵瓦官寺見之頃官安德借錄此本僧人事迹率多文

人粉飾然六朝士夫無所自存遁入釋道故多通品辭理可觀
且足資攷史之處地方古跡亦可借證實爲有用之書

肇論中興集解三卷

明翻刻宋本

鳴野山房藏書

晉水沙門淨源集

前有小招提寺僧慧達序稱長安肇法師所作宗本不遷等四
論按四論一曰物不遷二曰不真空三曰般若無知四曰涅槃
無名後有宋嘉祐戊戌潛軒題辭夢溪筆談嘗引其說末有鳴
野山房主人識云肇論中興集解後秦釋僧肇撰晁公武讀書
志作四卷云師羅什規模莊周之言以著此書傳燈錄云肇後
爲姚興所殺高僧傳不載其事此本爲宋釋吳中淨源集解大
藏目不收此注何也傳是樓藏有宋本拜經樓得之此乃翻宋
雕者

續高僧傳四十卷

明刊本

唐釋道宣撰

道宣姓錢氏丹徒人隋末居終南白泉寺又遷淨業寺至唐高宗時乃卒持戒精苦釋家稱之宣律師嘗著廣宏明集三十卷此續高僧傳乃繼慧皎而作自序始距梁之初運終唐貞觀十有九年一百四十四載包括岳瀆愿訪華夷正傳三百三十一人附見一百六十人右與慧皎初傳四庫均未之收登此以補梵筴之闕

一切經音義二十五卷 莊刻本 孫淵如校

大慈恩寺翻經沙門元應撰

是書經阮文達續進四庫前有終南太山釋氏大唐眾經音義序云大慈恩寺元應法師以貞觀末拈拾藏經爲之音義注經訓解援引羣籍證據卓明煥然可領結成三帙云云故唐書藝文志著錄名眾經音義也此武進莊所刻本復經孫淵如用

朱筆校有孫星衍白文方印

清涼傳二卷廣清涼傳三卷續清涼傳二卷

傳鈔本

何夢華藏書

清涼傳唐藍谷沙門惠祥撰廣清涼傳宋清涼山大華嚴寺壇
長妙濟大師賜紫沙門延一重編前有嘉祐庚子郗濟川撰序
續清涼傳題朝奉郎權發遣河東路提點刑獄公事張商善述
後附朱少章臺山瑞應記故姚孝錫序有張相國朱奉使又續
爲傳記之語少章天覺生非同時疑金源釋子彙萃成書耳後
附王勃釋迦佛賦釋迦如來成道記補陀傳峨眉讚據慧瑄跋
因善寶師獨行忽見空中現文殊普賢觀音三大士之和故編
入續傳亦足以傳永久云云是天順刊版時增入前有大定辛
丑沙門廣英序大定四年姚孝錫序末有天順六年釋慧瑄重
刊此書後序此本從之影寫卷尾有錢塘何氏夢華館嘉慶甲
子後所得書朱文大方印

開元釋教錄二十卷

明刊本

唐西崇福寺沙門智昇撰

智昇開元中居長安西崇福寺前有自序以三藏經論序爲目錄分爲二編一曰總括羣經錄皆以釋人先後爲次第先列朝代姓名次列所譯經名卷數及或存或佚末爲小傳凡九卷其第十卷則歷代佛經目錄四十一家一曰別分乘藏錄分七子目各以經論類從以辨別存亡眞僞及刪併重修之類凡八卷其十九二十卷則大小乘經論入藏目錄朱檢討經義攷全攷此例有一木記曰臨濟三十二世行涯請書本全藏二百八十八套永鎮如如菴康熙丁未佛誕日記此則如如菴遺物也

甄正論二卷

明鈔本

王謫士藏書

唐佛授記寺沙門元嶷撰

此從釋藏鈔出列輦字一二三號每卷後有音義其書託帶俗

公子甄正先生答問仿桓寬鹽鐵論反覆辨難大旨周老以伸
佛文筆古雅詞藻富麗可觀也藍絲闌白棉紙爲天一閣舊藏
王謫士避亂甬上得之有湛廬藏書王金鈐湛廬諸印

禪宗永嘉集二卷

明嘉靖刊本

唐永嘉沙門元覺撰

前有翰林學士楊億述無相大師行狀元覺永嘉人姓戴氏卅
歲出家徧探三藏南適曹溪嗣法於六祖慧能師退述二卷勒
爲十篇唐慶州刺史魏靜爲之序宋石壁沙門行靖爲序注又
有宋閩南宗沙門戒珠序嘉靖三十八年寓杭州佛慧寺沙門
眞源募緣刊版留昭慶經坊

宋高僧傳三十卷

明刊本

宋左街天壽寺通慧大師賜紫沙門贊甯等奉敕撰

前有端拱元年十月日贊甯進書表又贊甯自序按高僧之名

起於梁釋惠敏分譯經義解兩門釋慧皎復加推廣分立十科至唐釋道宣續高僧傳蒐輯彌博所載至唐貞觀而止贊甯又續道宣而作所錄始唐高宗時門目亦仍其舊凡正傳三十三人附見一百三十人傳後附以論斷於傳授源流最爲賅備

景德傳燈錄三十卷

宋刊本

按傳是樓藝芸精舍宋版書目俱載此書疑徐歸於汪卽祇一帙耳此存卷五至卷九又十三至十九又二十三至四凡十四卷每半葉十五行每行二十八九字不等字畫端湛洵宋槧之佳者考此書尙有元延祐刊本首列楊億序更列紹興壬子鄭昂跋紹興四年劉棐後序此在闕卷之中無從案核也有越溪草堂一印天祿琳琅中亦有此印云無攷

法藏碎金錄十卷

明趙府居敬堂刊本

李滄葦黃蕘園藏書

光祿大夫太子少傅上柱國澶淵晁迥

迴自序云天聖五年退居昭德里所作融會佛理隨筆記載殆
宗門語錄之類名錄之義取世說新語安石碎金也其五世孫
公武郡齋讀書志附載道院集後雖書錄解題列之釋家然傳
本絕罕明嘉靖乙巳裔孫翰林檢討璵始從館閣錄出鏤版以
行附載文元公逸事六則舊爲季滄葦藏有季振宜藏書印及
古吳王氏印黃薤圃手跋謂明刻之可貴直將歷過宋元鈔校
之後書囊無底山谷豈虛語哉

晁文元公道院集要三卷

明刊本

光祿大夫太子少傅致仕濱淵晁迴

前有治平乙巳清源王古序後有雲龍李氏題跋慶元乙未校
官黃汝嘉刊嘉靖甲寅裔孫璵東吳重刊

四家錄二卷

元刊本

王藹士藏書

洪州黃龍山住持傳法沙門惠南編

前有元豐八年十一月一日朝散郎尚書主客員外郎輕車都尉楊傑序後有至正二十三年閩建陽高仰大覺妙智禪寺住持師啟跋云馬祖大師倡道江西旣而百丈黃檗臨濟繼踵迭出振張其宗赫然行乎天下後世黃龍南公集其問答爲四家語版行於世久而漫滅山中首座慧欽得其善本乃與藏主義慶義深募緣繡梓蓋錄江西馬祖大寂禪師洪州百丈大智禪師筠州黃檗斷際禪師鎮州臨濟惠照禪師語也

翻譯名義集十四卷

元刊黑口本

宋姑蘇景德寺普潤大師法雲編

前列宋唯心居士荆溪周敦義序并目錄此書分爲十四卷蓋每卷分爲二也未刻行業記二後有音釋仍元刻之舊有摩訶菴印本端之印

翻譯名義集七卷

日本刊宋本

姑蘇景德寺普潤大師法雲編

每葉十二行每行大字十注倍之前列紹興丁丑唯心居士荆溪周敦義序序後係讚語接普潤大師行業記卷七末刻寬永戊辰跋

禪林僧寶傳三十二卷

明刊本

明白菴居沙門惠洪撰

惠洪一名德洪字覺範筠州人大觀中嘗游丞相張商英之門後謫朱崖是書前有宣和六年長沙侯延慶序稱達磨六傳至大鑒鑒後析而爲二其一爲石頭雲門曹洞法眼宗之其一爲馬祖臨濟潯仰宗之是爲五家宗派嘉祐中達觀曇穎禪師嘗爲之傳載其機緣語句而略其始終行事德洪載其入道之緣臨終之效又取雲門臨濟兩家之裔蘄然絕出者合八十一人各爲傳而繫以贊其才則宗門之遷固也有寶慶丁亥臨川張

宏敬序稱舊本藏在廬阜失於回祿錢塘風簞山僧廣遇重爲校梓元至順改元絕際菴主因舊版漫滅募緣鋟木及半而歿次年師弟比丘善立圓成之附臨濟宗旨一卷舟峰菴沙門慶老撰補僧寶傳一卷

林間錄二卷後集一卷

明萬厯刊本

高安沙門釋惠洪集

前有大觀元年謝逸序云惠洪與林間勝士抵掌清談每得一事隨卽錄之本明上人析爲二卷刊版以傳郡齋讀書志稱所記皆高僧嘉言善行然多訂贊甯高僧傳諸書之譌又往往發明禪理不盡敘錄舊事後集一卷乃惠洪所作贊偈銘三十一首漁父詞六首未知何人附入末有萬厯甲申夏日馮夢植跋云顧邑侯務遠因包先生勸刻此錄邑侯海虞人余同年進士也

五燈會元二十卷

明嘉靖刊本

右爲宋釋普濟撰普濟字大川號隱寺僧嘗取景德傳燈錄天聖廣燈錄建中靖國續燈錄聯燈會要嘉泰普燈錄撮其要旨彙爲一書故曰五燈會元以七佛爲首次四祖五祖六祖南嶽青原以下各按傳法世數載入焉攷論宗系最爲詳明前有元至正二十四年杭中天竺天歷萬壽永祚寺住持番陽釋延俊序嘉靖辛酉陸光祖爲徑山大慈重刻募緣文蓋徑山寺所募刊而版留於嘉禾者也

大慧普覺禪師書二卷附年譜一卷

明刊本

參學慧然錄淨智居士黃文昌重編

禪師諱宗杲甯國縣人姓奚氏元祐四年十一月十日母夢神人衛一僧黑頰而隆準造臥室問所居對曰嶽北誕之日白光透室舉邑歎異年十七納僧服請戒於景德寺七十歲被旨遷

住徑山七十四歲孝宗卽位賜大慧禪師明年隆興元年八月十日親書遺奏示寂徑山明月堂讀偈法語無慮數十萬言參徒道印編爲六十卷奉置於菴淨智居士黃翰林文昌哀其綱要刊行於世賜入大藏此二卷後有文昌識語末有萬歷二年四明崇三居士刊於陝西布政司之槐鶴軒一條又禪師年譜一卷爲門人宗演於開禧乙丑所纂末有嘉興包檉芳施銀拾兩刻年譜一卷兩本一梓於陝藩一梓於嘉禾今合之以示雙參云

佛果圓悟禪師碧巖錄十卷

明刊本

錄分十卷各以四字標目凡一百則皆敘禪門古德因緣問答語錄乾隆元年奉特旨入藏此爲明時雲棲寺刊本

月江和尚集二卷

元刊本

汪季青周松齋藏書

月江爲中峰四世徒孫趙孟頫極重之此其遺著也上卷爲住

持各寺所說語錄下卷則讚及偈頌題跋也前有至元庚辰釋
大訢序後有釋紹義清茂德海跋語每半葉十一行每行二十
二字有休陽汪季青家藏書籍朱文方印古香樓周春松靄展
硯齋諸印

石屋和尚住嘉興福源禪寺語錄偈頌二卷

元刊本
藏書

汪季青周松

參學門人至柔編

前有沙門來員序後有元旭撰塏銘云師諱清珙字石屋蘇之
常熟人也生於宋咸淳八年元至正壬辰示寂壽八十有一按
四庫存目列石屋山居詩一卷不著其名詩中有吾家住在
霅溪西之語蓋元代湖州僧也因未得語錄及塏銘無從著其
名字僅附明末徵此幾不能攷其行業矣有古香樓休甯汪季
青家藏書籍周春松靄勢溪查氏諸印

神僧傳九卷

明素庵刊本

此書首列永樂十五年正月御製序云有閒繙閱采輯其傳總爲九卷使觀者不必用力搜求一覽而盡得之遂用刻梓以傳似爲永樂時御撰之書何以焦氏國史經籍志云不知誰作豈未見原序耶每卷有西天竺青河髮僧梓一行則秦藩別號也東林十八高賢傳一卷

明刊本

前有黃汝亨序云此傳刻在廬山未獲流布樂愚上人謀新業於棲賢山中尋授吳門毘耶室梓行傳列慧遠法師以次諸賢又不入社諸賢又龍眠李伯時十八高賢圖并記圖成於元豐庚申十二月二十五日

右釋家類

道德真經二卷文始真經三卷冲虛真經八卷南華真經十卷

明刊本

四書皆白文無注惟道德經有太極左仙公葛元序餘皆無序跋版心分孝弟忠信禮義廉恥爲號殆仿道藏之編號歟有蕭

山王端履年四十後所得書一印

老子道德經二卷

聚珍本

盧抱經校藏

晉王弼注

後有政和乙未嵩山晁說之跋又乾道庚寅鎮江府教授熊克跋稱近世希有久而後得蓋自宋已然此注從明華亭張之象本錄出又以大典本參校攷訂而始印傳盧弼弓學士又以道藏本重加校正焉

道德真經廣聖義五十卷

明鈔道藏本

唐廣成先生杜光庭述

前有天復元年九月十六日序云老君降跡行教遠近有四其一歷劫稟形隨方演化卽千二百號百八十名散在諸經可得徵驗其二自五太之首逮殷周之前爲帝王師代代應見其三以商陽甲之代降神寓胎武丁之年誕生於亳周昭王癸丑年

以經授關尹世得而聞其四將化流沙與尹喜期會於西蜀青
羊之肆示現降生卽昭王丁巳年也此經自函關所授累代詮
疏箋註六十餘家詳見後學披卷多嘗本源探摭眾書研尋篇
軸隨有比况咸得備書纂成廣聖義五十卷道藏目錄云內述
太上事跡氏族降生年代敘經大義解疏序引釋御註序釋題
明道德義天一闕書目著錄此書白紙藍格或卽其散出之遺
穎濱先生道德經解二卷

明刊本

鳴野山房藏書

右爲宋蘇轍撰此解大觀二年十二月子由自題云年四十有
二謫居筠州有道全者嘗與余談道予以中庸喜怒哀樂未發
謂之中發而皆中節謂之和中者天下之大本和者天下之達
道致中和天地位萬物育非卽六祖所言之不思善不思惡正
喜怒哀樂之未發也蓋中者佛性之異名和者六度萬行之總
目致中極和而天地萬物生於其間非佛法何以當之全曰今

而後始知儒佛一法也時方解老子每出一章輒以示全云又題云子瞻謂予所解老子差若不及及至海康凡所爲書多所更定再錄老子書以寄子瞻旋得疾不起逮今十餘年竟不知子瞻爲可否政和元年得姪適所編先公手澤中有云使戰國有此則無商韓漢初有此則孔老爲一使晉宋間有此則佛老不爲二不意老年見此奇特然後知此書當子瞻意云未有萬曆二年宏甫跋

道德真經傳四卷

舊鈔本 汪魚亭藏書

資政殿學士呂惠卿傳

此書從道藏必字號錄出前列進書表題元豐元年正月日資政殿學士通議大夫定州路安撫使馬步軍都總管兼知定州軍州事及管內勸農使上輕車都尉東平縣開國伯食邑八百戶臣呂惠卿上表按白雲齋注道藏目錄洞神部神符類云此

書言陰陽動靜知時盡神渾融治身理國之道

老子虛齋口義二卷 明刊本

虛齋林希逸

前有虛齋自撰發題一篇希逸字肅翁福清人官至中書舍人
虛齋者其居室也書以口義者謂其不為文雜俚俗而直述之
也 四庫與列子同未著錄

道德真經義解四卷 明刊道藏本

息齋道人解

道藏目錄入洞神部作義解四卷注云九天觀道士息齋李榮
注深達竅妙出入無有榮字嘉謀宋時人行事無所攷道藏收
其著述亦潛心道笈之羽士也其解順文衍義明白曉暢為讀
王弼注之階梯

元始說先天道德經五卷 明刊道藏本

息齋道人解

此經妙篇元篇神篇真篇道篇各一千言道藏目錄入洞真部
前有序云此宋李君嘉謀隨章爲解版行西蜀寶祐間謝公圖
南爲序而傳則蜀本已不存觀文殿大學士可齋李公授之嘉
興道士李公可久募工鈔并爲之序吳郡張善淵獲其本復鈔
嘉靖丙寅龍陽山人萬厯乙亥勾谿山人李械並有題識

道德寶章一卷

翻元刊本

紫清真人白玉蟾注

末有翰林學士承旨榮祿大夫知制誥兼修國史趙孟頫一條
松雪齋趙氏書印兩記讀書敏求記云趙松雪愛其言不類諸
家手書以傳予觀所注皆修煉之言卽此書也

道德元經原旨四卷元經原旨發揮二卷

明鈔道藏本

教門高士當塗杜道堅注

藏書志卷二十二

士

原旨前有大德乙巳小雪嗣天師張與材序又山陰王易簡理得序又甲午陵陽牟獻序曰杜君博極羣書不但發明宗旨於經某章曰是堯舜之事某章又曰是禹文武之事其說以爲老聃爲柱下史所職者史而百篇之書亦史也故以書求之余驚異焉故白雲霽道藏目錄謂原旨序詳切而淵博也發揮十二章前六章述帝帝王伯道德功力之敘後六章述太上降生受西遊之略總之不外理炁象數有大德十年道堅自序及弟子句章任士林後序此帙棉紙藍格尤屬明鈔當是甬東范氏遺籍

道德經集義二卷

明刊本

即墨周如砥纂集

如砥字礪齋山東卽墨人嘉靖己丑進士改庶吉士歷官國子監祭酒贈禮部右侍郎嘗採摭洪武道德經注開元政和御注

及河上公等六十餘家之說附以已見逐章逐節爲此集義前有詹事豫章傳冠序後有左春坊左諭德兼翰林院侍講晉江黃景昉撰傳及如砥另燝後序時在崇禎九年存此集義卽存六十餘家之舊說也

老子道德經解二卷

明刊本

明建鄴憨山道者釋德清著

前有老子傳及發明宗旨發明趣向發明工夫發明體用發明歸趣五篇以佛證道具得元解末有版存玉溪菩提寺木記

關尹子三卷

明刊本

宋陳顯微抱一子注明朱蔚然茂叔父校

前有顯微自序及一字二柱三極四符五鑑六七七釜八籌九藥篇目顯微字宗道自號抱一子淮陽人宋嘉定間爲臨安佑聖觀道士嘗著周易參同契解三卷及此書道光間金山錢氏

刊入守山閣叢書不及此本之善

祕傳關尹子言外經旨三卷

明刊本

宋抱一先生門弟子希微子王夷受撰

前有寶祐二年陳顯微自序及門弟子王夷受咸和二年葛稚川序凡九篇一百七十章 四庫提要引俞琰席上腐談稱舊有陳抱一注又大德中杜道堅注名曰闢元今皆未見顯微本臨安佑聖觀道士尙有周易參同契解亦弟子王夷受所刊而宋樓藏至元間浙西道杭州路梅橋南玉屏福惠觀刊本先爲阮氏元影寫進 呈擘經室外集載有提要

沖虛至德真經八卷

元刊本

張湛處度注

首有張湛序及目錄劉向校上記目錄首題唐富塗縣丞殷敬順釋文卷端題沖虛至德真經卷第一次題列子每半葉十一

行行二十一字疑元末麻沙刊本

冲虛至德真經解八卷

精鈔本

宋江適撰

明白雲霄道藏目錄洞神部至訣類列此解凡二十卷宋杭州學內舍生臣江適進此解天瑞篇盡性達命之旨焦竑經籍志當據此載列也唐天寶元年詔列子爲冲虛真經宋景德中加至德二字故政和間徽宗御注已稱冲虛至德真經義解其晉之張湛唐之盧重元宋之范致虛高守元合有四解唐殷敬順撰有釋文宋林希逸著有口義今傳者張殷林三家而已學之三舍始立於徽宗朝通稱內舍生其經進必在道君上號之時惟文詞雅飭思致元遠領要標新頗得言外之旨八卷首尾完具當是合并之本

列子八卷并盧校明刻殘本四卷

明刊本 盧趙經校

東晉光祿勳張湛注

前有張湛處度撰序次列子目錄臣向上言此爲明處九章王震亨訂正別有正德堂刊列子卷五至八殘本四卷爲盧抱經學士所校未有硃筆記云舊所有者宗人之願校梓本也又記云乾隆癸卯八月十日校前四卷訖十一日復將說符篇釋文校對其前四卷因純陽宮近作鄉試供給所須俟揭榜後方可往借也弓父記按宗人之願卽撰本草乘雅半偈之盧隱君也純陽宮在平安坊中有道藏全書乾隆間尙借作鄉試公所非如今日之別設府館近且大也

列子張湛注附殷敬順釋文八卷

鈔本

張處度注本有端刊見於盧抱經羣書拾補中此書帙面書庚寅鞠秋倩孫伯愚鈔藏并附殷敬順釋文似非出於端刊本者書爲清吟閣瞿氏劫後散出姑存備參看

列子虛齋口義二卷

明刊本

虞齋林希逸

前列光祿大夫臣向所校刊列子書錄永始三年八月壬寅上一篇後虞齋識云洪景廬謂列子勝莊子則失之矣然其間文有絕到之語決非秦漢而下作者所可及愚意此書必爲晚出或者因其散佚不完故雜出已意且模仿莊子以附益之是編四庫未收所刻與莊子口義同時

南華真經十卷

明世德堂刊本

會稽鄧氏世學樓藏書

郭象子元注陸德明音義

前有象撰序象河南人事蹟具晉書本傳世說新語曰注莊者數十家莫能究其旨統向秀別爲解義大暢元風惟秋水至樂二篇未竟而卒秀子幼象竊秀注乃自注秋水至樂又易馬蹏一篇其餘點定文句而已後向注復出遂兩本並行今乃向佚

郭存以陸氏釋文所引互校攘竊之迹灼然可見此爲世德堂刊本鈕氏世學樓所藏經廬抱經校正

纂圖互注南華真經十卷

元刊本

晉郭象子元注唐陸德明音義

前有河南郭象序次列太宗師天生地在太極之先一段卽目爲莊子太極說後繫以周子太極圖并圖說蓋宋時麻沙本而元代重刻之也有曾在東山劉惺處含青樓藏書記傳經堂鑒藏諸印

莊子膚齋口義十卷

明刊本

膚齋林希逸

前有膚齋發題一篇是編獨收 四庫提要稱其循文衍義不務爲艱深之語剖析尙爲明暢差勝後來林雲銘輩也後有景定改元知建甯縣林經德序附釋音一卷明正德戊寅南京國

子司業弋陽汪偉跋嘉靖乙酉貴溪江汝璧合梓三子口義跋
南華真經義海纂微一百六卷 杜氏精鈔本

武林道士褚伯秀學

前有莊子小傳及咸淳元年四月劉震孫文及翁又乙丑八月
鄱陽湯漢三序後庚午伯秀自識並載所纂諸家注義姓名纂
十三家之說而斷以己意謂之管見中多引陸德明經典釋文
而不列於十三家中是主義理不主音訓也成元英疏文如海
正義張潛夫補注皆間引之以在景元註內也范元應爲伯秀
師故稱先生而述其緒論也宋以前解南華者大率具是矣周
草窗至元丁亥九月與伯秀及王磐隱游閱古泉則著此書後
尚健在也乾隆間吳山元妙觀道士黃含山鶴手鈔此書十年
方成胡書農學士嘗記之此爲山陰杜氏知聖教齋鈔本

列仙傳二卷

明刊本

漢光祿大夫劉向撰

陳振孫書錄解題云凡七十二人每傳有贊似非本書西漢人文章不爾也館閣書目作三卷六十二人崇文總目作二卷七十二人此本分上下二卷載赤松子至元俗凡七十人內江妃二女應作二人與葛洪神仙傳序稱七十一人適合爲嘉靖甲午五嶽山人黃省曾序刊有華陽山人皇甫冲中南山人黃魯曾前後序又附續仙傳祇一卷十六人不全殆當時失攷而刊歟

抱朴子內篇二十卷外篇五十卷

明魯藩刊本
硯樓藏書

盧抱經校袁氏五

晉丹陽葛洪稚川著

前列洪序內篇論神仙修煉符籙効治諸事純爲道家言外篇論時政得失人事臧否多作排偶之體而詞旨辨博饒有名理此明嘉靖乙丑魯藩從正統十年道藏本繙梓版心題敕賜承

訓書院並爲刻序明烏程盧氏又從而翻刻者也顧澗蘋謂外篇中百家文行與尚博篇文有複出應刪併改定合自序恰得五十篇之舊後孫淵如刻入平津館叢書卽權輿是本然亦祇刪內篇末之別旨一篇及於結鮑篇內二百七十字疑當移易云云餘則小小校正無大異同也後有袁廷檣手記云此從道藏本傳刻字句及分卷無少異其紅筆係抱經先生所校不知所据何本有河間章寶泉筠房金石閣諸印

元眞子一卷 明刊本

唐張志和撰

右爲碧虛鸞鶴濟之靈三篇如以篇爲卷與陳振孫時所見相合故錢遵王著錄元眞子外篇三卷是也並云志和字子同婺州人唐肅宗時以明經擢第待詔翰林坐事貶南浦尉自稱煙波釣徒亦號元眞子事蹟具新唐書隱逸傳此不題外篇不知

何時所削并三爲一也

天隱子一卷

明刊本

前有司馬承禎序書凡八篇一神仙二易簡三漸門四齋戒五
安處六存想七坐忘八神解皆修煉形氣養和心靈之妙道也
並有後序口訣紹興壬午胡璉嘉定己卯王倫大德丁未唐巖
起皆有跋金華宋濂題稱承禎字子微著坐忘論豈天隱卽其
人歟

無能子三卷

明刊本

序稱光啟三年天子在褒則唐僖宗時人晁公武讀書志云其
書明老莊自然之旨今按品目凡三十四篇編作三卷惟卷上
闕第六篇卷中闕第五篇卷下闕第七第九第十第十二第十
四等七篇內殷字皆闕筆猶仍宋刻之遺

雲笈七籤一百二十二卷

明刊本

王蘭泉藏書

宋張君房輯 明張萱訂

前有君房自序三洞四輔道家舊目采掇精要攷覈例類悉著指歸道藏菁華略具於是張萱自號清真居士版心刊有清真館云每卷下各有某字幾蓋道藏字號有三泖漁莊青浦王昶琴德一字蘭泉舊山樓鐵如意齋清玩次侯讀過諸印昶又號述庵青浦人乾隆甲戌進士官至刑部侍郎

張叔平悟真篇集注五卷 元刊本

宋張伯端撰注則不知何人所集所引有葉士表袁公輔李筌象川翁爭月翁真一子道光禪師諸家疑元人所爲前有熙寧乙卯歲自序後有元豐改元壬戌歲自跋第五卷添入禪宗歌頌豈道家之言必歸宿於禪宗歟案 四庫著錄張伯端悟真篇註疏三卷附真指詳說一卷爲翁葆光元戴啟宗疏似別一書也

俞石澗易外別傳一卷 影元本

此書本附周易集說後見其子仲溫跋通志堂重刊時所刪前列至元甲申八月古吳石澗道人俞琰自序末又有後序十九葉有孫男楨拜書五字一行蓋寫以上版者又附元牝之門賦一篇水中金詩一首卽其子跋所云近刊陰符經解以是稟繕寫同錄併沁園春解三書共爲一帙總名之曰元學正宗按提要元學正宗二卷所謂易外別傳者止一詩一賦想卽此耳末又有至正戊子其子仲溫跋道藏目列太元部

清菴先生中和集前集三卷後集三卷 影元鈔本

都梁清菴瑩蟾子李道純元素撰門弟子損菴寶蟾子蔡志頤編前有當塗南谷杜道堅書於錢塘元眞館序文并目錄前集上元門宗旨盡前密意中金丹祕訣下問答語錄全眞活法後集上論說歌中詩下詞隱語後有大德丙午中元翠峰丹房刊行

一行道藏目錄云觀中和集中至於先天太極自然金丹光照太虛不假修鍊者漏泄無餘矣可以窮神知變而深根寧極可以脫胎神化而復歸無極矣抑以見道之有物混成儒之中和育物釋之指心見性此皆同工異曲咸是太極中來是書可謂通儒貫釋之至言也

龍門子凝道記三卷

明刊黑口本

提要入增存作二卷乃嘉靖丙辰與郁離子合刻於開封李濂爲之序余家亦有之此單刻本也自序至正丙申入小龍門山著書丁酉書成俾仲子璵重錄成編釐爲上中下三卷有四符八樞十二微凡二十有四篇蓋道家言也

徐氏真錄五卷

明正統刊本

前有明永樂甲辰福建布政使麻勉舊序云閩城南有金鰲峰峰下靈濟真君祠神姓徐乃偃王裔晉開運二年率師入閩道

經金鼈駐兵除寇及歸仙陰陽顯揚民賴以生鄉人方珏始立祠於芝嶼珏孫曰詢曰感曰仲白其事於執政聞於朝敕命始下宋政和七年始擇地於今靈濟宮聖朝祀典大光遂進徐仙眞錄備載事蹟前有正統八年閩縣訓導王用盛序曰神海州朐山人系出偃王後其父溫五代時爲吳相卒贈齊王謚忠武五子皆受封曰知證曰知諤者卽二仙也天福中封知證爲江王知諤爲饒王同鎮金陵率兵入閩蠻寇迎降遂立生祠凡旱潦蟲蝗之災水火寇盜之厄疾病婚葬之請隨禱隨應若響若答自宋以來累受封號至我朝永樂之間以神有翊衛聖躬弗豫之功聿新祠像御製碑刻褒封有加其祠官方文照舉神之世系行實靈跡華翰與前代我朝褒封碑刻久恐湮沒彙成一編名曰眞錄正統六年知泉州府同安縣新安朱徽又爲序云洪恩靈濟二眞君行實圖像封贈我朝太宗敕建宮宇御製碑

文并眞君所爲古賦記序詩歌箴兆彙而集之鎮國將軍孟城
孫公景康奉鎮福唐捐貲梓刻范氏天一閣書目載此書而黃
氏千頃堂書目刻洪恩靈濟眞人文集八卷元道士編南唐徐
知證乩筆也當先有刻之者惟神名一合一不合耳

神隱志二卷

明刊本

涵虛子臞仙製

臞仙者明甯獻王權號也是書備載服食養生四時藝植之事
卷首有壺天神隱記並自序明史藝文志列其目

旌陽石函記一卷

明刊本

王謫士燕書

三一居士邵輔注

前列嘉靖丁未二月春分日戚畹武林邵輔自序云旌陽公慨
世易感虛無也於是窮神闢化鉤索鬼神引索爻象比方日月
愚乃研思有年緇閱疑殆靡敢徇私以耀焉取注所隱將以釋

已然聞見之餘曷容自私遂僭刻以廓仁者之心計論七篇天一閣書目亦有之按輔字元文充郡學生錦衣衛指揮僉事卽封昌化伯林之孫邵太后之姪林有墓在南山荔子峰下有園在闕版橋吳穀人祭酒所詠皇親巷邵氏園歌是也

右道家類